

Regarde de l'autre costé ces ieunes François qui l'accompagnent, les plus beaux que i'aye iamais veu, que leurs habits sont riches, mais pluſtoſt preſte l'oreille à ce que me dit cette Dame, ô qu'il fait beau la voir! là deſſus elle incline à la mort. Elle fut la ſeconde enterrée en noſtre Cemetiere de ſainte Marie, y ayant eſté tranſportée de ſon bourg où elle mourut, eſloigné de ſix lieües, ainſi que de ſon viuant elle l'auoit deſiré.

Nous auons eſté plus de huit mois ſâs ſçauoir cette particularité de ſa mort, ſon fils Paul n'ayant pas tenu plus de conte de cette viſion que d'une reſuerie, dans la penſée qu'il auoit qu'il ne pouuoit y auoir d'autre veü que celle des [93] yeux. Vn iour par vn rencontre il raconta le tout à ſon ainé Eſtienne Totiri, qui enfin nous le declara il y a quelques iours fur le point qu'il eſtoit de partir pour la guerre, nous diſant qu'il croyoit pour luy que ces ieunes François d'une beauté ſi rare eſtoient des Anges du Ciel qui tenoient compagnie à la tres-ſainte Vierge, pour qui ſa mere auoit eu des deuotions ſi tendres.